

**PM rasmi MSAM 2012 hari ini**  
**Utusan Online**  
**20 April, 2012**

KOTA KINABALU 19 April - Perdana Menteri, Datuk Seri Najib Tun Razak dijadual merasmikan acara tahunan terbesar Permodalan Nasional Berhad (PNB), Minggu Saham Amanah Malaysia (MSAM) 2012 di Kompleks Sukan Kota Kinabalu, petang esok.

MSAM 2012 yang bertemakan 'Pelaburan Untuk 1Malaysia' adalah penganjuran kali ke-13 berlangsung selama 10 hari sehingga 28 April ini. Kemasukan para pengunjung yang dibuka mulai pukul 9 pagi esok adalah percuma.

MSAM yang dianjurkan sejak tahun 2000, telah menjelajahi seluruh negara setakat ini, kecuali Perlis dengan mencatatkan bilangan pengunjung seramai 2.07 juta.

Pameran terbesar itu bakal disertai oleh Amanah Saham Nasional Bhd. dan lebih 50 syarikat milik PNB termasuk Malayan Banking Bhd. (Maybank), Sime Darby Bhd. (Sime Darby), I&P Group, UMW Holdings Bhd., Chemical Company Malaysia Bhd. (CCM), Perusahaan Otomobil Kedua Sdn. Bhd. (Perodua) dan Projek Lintasan Kota Holdings Sdn. Bhd. (Prolintas).

Badan-badan pengawas selia kewangan termasuk Bank Negara Malaysia dan Suruhanjaya Sekuriti turut menyertai MSAM 2012.

Sementara itu, Ketua Menteri Sabah, Datuk Seri Musa Aman yang meninjau tapak pameran kira-kira sejam di sini berpuas hati dengan persiapan terakhir yang sedang giat dijalankan di Kompleks Sukan Kota Kinabalu.

Katanya, Sabah sungguh bertuah kerana turut diberi peluang untuk menjadi tuan rumah MSAM dan meminta semua rakyat Sabah tidak melepaskan peluang keemasan untuk mengunjungi pameran MSAM itu.

"MSAM adalah pameran terbesar pernah diadakan di negeri ini dan kita amat bertuah kerana PNB memilih Sabah.

"Justeru, saya mahu rakyat Sabah mengambil peluang keemasan ini mendapatkan ilmu pelaburan sebanyak mungkin, sambil mengenali syarikat-syarikat gergasi di bawah PNB," katanya ketika ditemui di sini.

PNB menyasarkan sejumlah 200,000 pengunjung pada MSAM 2012 kali ini.

Selain mendalami ilmu pelaburan, para pengunjung boleh menyertai pelbagai aktiviti pelaburan dan khidmat nasihat kewangan.

Sambil mengikuti aktiviti tersebut, para pengunjung juga berpeluang memenangi pelbagai hadiah lumayan termasuk Ford Fiesta 1.6L, Totota Hilux 2.5G dan MyVi 1.5 Extreme.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2012&dt=0420&pub=Utusan\\_Malaysia&sec=Ekonomi&pg=ek\\_05.htm](http://www.utusan.com.my/utusan/info.asp?y=2012&dt=0420&pub=Utusan_Malaysia&sec=Ekonomi&pg=ek_05.htm)